


360.139
139



圖整庫

興義府志續編

余隨侍完翁叔祖宦游興郡倏忽兩載將去郡矣見叔祖為政慈
愛嚴明視民事如已事一片婆心萬民咸悅壙粵黔奔走學植荒
蕪兼以素性迂拙從不耳聞外事諸多政蹟何能紀其巔末且就
數事及同人詩詞集成一編以俟後之君子採擇並非謂敢擅於
作志識者諒之

光緒九年癸未季夏月岳陽余厚壙謹記

興義府志續編卷一目錄

祠宇類

亭院類

積儲類

義學類

池塘類

廟宇類

賦稅類

戶口類

壽考類

關隘類

興義府志續編

卷一目錄

一

興義府志續編卷一

岳陽金厚堉輯



祠宇類

十八先生祠在小西門外馬場光緒九年知府余雲煥安義鎮總兵何雄輝合捐銀叁百兩修建亭榭池塘花木壁間鐫刻新舊憑弔詩詞頗有幽趣撥入西鄉安仁里三股井公田一所可收租穀二十市石永歸中營游擊府經歷經管輪辦祭祀通報有案

原在東門內今改為天主堂祠後并有公屋數所每歲收租以作歲修同治間苗變無存

節孝祠在東門內光緒八年知府余雲煥建修因東門內有杜姓入公屋基一所籌款銀壹百六十兩交紳士宋杰李驤等承修計上下興義府志續編 卷一 祠宇類 一

二棟兩廊房間祭器俱備通報有案

原在東門外文昌祠側同治間苗變焚燬無存

湖廣會館在北門外光緒五年知府吳宗蘭創建下殿三楹八年知府余雲煥建修大殿五楹廂房花廳頭門圍牆俱備正祀大禹附祀濂溪壽佛諸神

原在北門外名三楚宮同治間苗變燒燬無存

前署知府李公專祠在府署左倉後同治五年三月初十日回匪襲城殉難於何家井經回首馬子玉瘞軀於西門外志有石碣嗣由屬紳劉官禮等謀竊骸骨送寄家屬十一年城復事

聞十月初四日奉

上諭李保衡著追贈道員交部從優議卹並准其建祠欽此維時同

殉難之冊亨州同李華斗

江西人
贈知州

經歷徐海

江蘇人
贈知縣

均附祀光緒二

十九年屬紳劉官禮捐銀助修祠宇時公子大椿以普安同知調署知府出資添補三十年五月祠成詳

奏列入祀典春秋致祭其淺瘞處亦封植立石以留忠跡云

廟宇類

廟宇類

關帝廟在北門外光緒七年三月內被火災下棟焚燬九年知府余雲煥籌款銀壹百兩移交安義鎮周壽昌派員督修通報有案

龍王廟在東門內光緒九年知府余雲煥捐廉并諭住持募貲重建城隍廟在總兵署前左光緒八年知府余雲煥修葺一次并添修十殿神像通報有案

火神廟在南門外光緒八年知府余雲煥籌款銀壹百二十兩并廟内存項移交安義鎮周壽昌派員督修仍復舊制通報有案

原在南門外光緒六年被火災燒燬無存

馬神廟在小西門外馬場光緒八年安義鎮總兵何雄輝率合營將弁捐貲重建知府余雲煥撥入首廠塘大龍井屋基壹份田壹份共

十二丘每年納秋糧穀貳斗約收京斗租穀
作歲修之費

石歸廟內經營以

原在小西門外馬場同治間苗變無存

亭院類

申明亭在東門外鼠場光緒八年知府余雲煥建修每值場期率教官經歷諸生宣講

聖諭并撥入北鄉阿棒寨壩坎田一丘兔場了口田二丘那腊田一
丘喬心田一丘收租穀六京石又撥入南鄉木咱寨紅稗陀陸地一
股屋基對門山林脚田五丘水井路坎脚下田二丘收京斗租穀

石歸經歷司經營以作歲修之費通告有案札經歷司查明租石
尚未覆稟

養濟院在北門外光緒九年知府余雲煥捐建老額發孤貧口糧四
名在官莊米石項下報銷歷任以來每歲捐廉添養四名共八名由
府署每月每名發給京斗米叁斗通報有案

原在五洞橋東同治間苗變無存

演武廳在小西門外馬場光緒九年知府余雲煥籌款銀壹百壹拾兩移交安義鎮何雄輝建修每逢場期知府率教官經歷諸生宣講聖諭通報有案

原在小西門外馬場同治間苗變無存

賦稅類

實徵秋糧米原額三千二百一十二石九斗九升七合八勺五抄耗米四百八十二石四斗三升二合八勺改征米三百三十三石一斗三升一合九勺同治間苗變征收不能復額光緒八年知府余雲煥稟請藩司委員清查釐正厥冊以復正額通報有案

地丁銀原額三十七兩八錢六分五釐耗羨銀三十五兩七錢二分五釐八毫同治間苗變征收不能復額光緒八年知府余雲煥始得全數征解通報有案

鹽課銀原額一百六十六兩九錢一分遇閏加征一十三兩九錢一分同治間苗變征收不齊光緒八年知府余雲煥始得全數征解復額通報有案

魚課銀原額一十二兩同治間苗變不能復額光緒八年知府余雲煥始得全數征解通報有案

牙帖銀以前當課銀當帖銀鹽斤牙帖銀棉花牙帖銀銅鉛雜貨牙帖銀兵燹後一概無存近有胡太和鹽行帖每年完銀二兩五錢光緒八年知府余雲煥始得報解通報有案

積儲類

社倉分建四鄉各寨東鄉八寨十廩存穀四百二十石西鄉七寨九廩存穀四百八十一石南鄉一寨三廩存穀四百二十二石七斗北鄉七寨十四廩存穀八百二十四石六斗共倉三十六廩共存市石穀貳千壹百四十八石三斗合京斗四百九十六石六斗光緒九年知府余雲煥倡捐通報有案

戶口類

興義府戶口光緒七年知府余雲煥編查保甲本城四鄉共壹萬壹千八百一十一戶男女丁共五萬零五百三十口此兼漢苗總計之數也

興義府志續編

卷一

戶口類

六

義學類

義學類

育才義塾在屯脚光緒九年知府余雲煥建修因屯脚原有絕產可收京斗租穀六十餘石歸入文昌宮復據該地紳士胡克義等稟請撥歸屯脚以作義學膏火通報有案

壽考類

張王氏係貞豐州民王天培之女張世誠之妻張福恩之母乾隆四十四年生迄今光緒九年尚存現年一百零五歲貞豐州牧屠漢章請旌在案

池塘類

鎮火池在府署花廳前光緒八年知府余雲煥因城內多火災於廳前鑿金方圓二池并諭居民于街巷多置水缸鎮之火災遂斷有詩紀事泐石碑豎池邊

關隘類

花江巖在貞豐州城北九十里山高路險不利輿馬光緒八年安義鎮何雄輝捐廉籌款修理西路九年安義鎮周壽昌捐廉籌款修理東路并修渡船知府余雲煥捐銀五十兩現在修理尚未竣事

興義府志續編卷二目錄

藝文類

弔明十八先生墓

弔明十八先生文

過十八先生廢祠

重修十八先生祠作

弔十八先生

謁十八先生墓

過十八先生祠 二首

又

又

興義府志續編

卷二

目錄

一

又

興義多火患一月凡數見因諭居民鑿池徧街巷郡廨無井新

闢方圓二池落成口占二絕句紀事

次韻

又

春日鳳笙丈偕同人登半山亭亭瀕郡之綠海荷開時紅遍六

十里皆花惜亭圯太守擬修葺之為公餘小憩之所

荷花生日隨兗翁叔祖偕同人至半山亭賞荷有作

湖廣會館碑記

登桅竿山雜詠 四首

秋日城東閒步

詠雞埵菌

九日登梳竿峯

題鳳笙盤江送別圖 三首

去郡有日矣徐芷沅教授為畫盤江送別圖并繫三詩依韻和之

明十八先生祠記

前興義府李公專祠記

張秀姑詩有序 十二首

南籠紀事

頌郡侯余鳳笙先生新政

又

興義府志續編

卷二

目錄

二

又

擬楚祠

又

客有自南籠來者具道余鳳笙太守新政因倣栢梁體以紀其

事

張秀姑行

又

詠張秀姑識呈鳳笙師二律

古歌一篇奉寄鳳笙太守

長歌一首呈鳳笙太尊

張娥行

張女行

張黃訟平偶紀六絕句

詠張秀姑詩四首

奉題鳳笙太守判張秀姑事調寄賀新郎

附聯語

試院聯

府署聯四

湖廣會館聯二

養濟院聯

申明亭聯

十八先生祠聯

興義府志續編 卷二 目錄

三

又

又

又

又

興義府志續編卷二

岳陽余厚壻輯

藝文類

弔明十八先生墓

秀水舒位鐵雲

貌諸孤叢爾國天荒荒地窄窄十八人罹此厄計雖非氣自直同日
死異代惜田橫島孟嘗客彼三千此五百黃土黃碧血碧秋風楊春
雨麥我從軍弔遺跡短歌行長嘆息

見瓶水齋集

弔明十八先生文

桂林韋業祥伯謙

大清順治十有一年夏四月故明大學士吳貞毓等十八人謀討逆
臣孫可望不克死之十八人者贈少師太子太保吏部尚書中極殿
大學士宜興吳公貞毓刑科給事中甯國張公鐫武安侯中軍左都
興義府志續編 卷二 藝文類 一

督畝鄭公允元大理寺丞湖廣林公鍾太僕寺少卿袁州趙公賡禹
檢討晉江蔣公乾昌善化李公元開吏科給事中江西徐公極江西
道御史錢塘周公允吉廣西道御史南昌朱公議景福建道御史進
賢胡公士瑞兵部郎中四川朱公東旦工部郎中九江蔡公縝主事
廬陵易公士佳員外郎鄞任公斗墟主事李公欣太監張公福祿全
公為國也初明亡永明王假號粵中蹙於我大軍西徙安隆就其
降將孫可望可望驕不臣王憂懼語福祿為國欲倚晉王李定國制
之於是貞毓等謀以王令召定國兵入衛而兵科給事中新甯林公
青陽請行久之事洩可望執貞毓等嚴掠之十八人者並從容罵賊
死嗚呼烈矣傳有之曰臣竭其股肱之力加之以忠貞其濟君之靈
也不濟以死繼之夫明裔數蹶永明一線蹙在遐邊此其勢不待智

者而決之也彼十八君子者獨竭心所事而成敗利鈍有弗計焉不庶幾無忝於忠貞而克善其死者乎觀貞毓之言曰結定國討可望者貞毓也諸臣無與續則曰今日續等必承此獄以見臣子報國苦衷由是衆皆承吁謂非勇於為義當仁不讓而有是也今諸臣往且二百年矣而流徽遺教足以激義而勸忠曩嘉慶之初苗變倉猝郡官民猶有能守土完忠以上邀聖主之褒嘉而為郡永此今名者不可謂非諸君子扶衰起懦有以肇於前也十八人既死事家人合葬於馬場青陽以奉使後至亦死之葬于所乾隆中

高宗純皇帝褒悼勝朝殉節諸臣賜貞毓曰忠節鐫至斗墟十四人暨青陽通諡烈愍於是學使洪亮吉知府曹廷奎修其墓沈越記之中更燹亂樵禁弛焉葉祥奉使是邦循眺遺墟殘碣遺文闕焉莫續與義府志續編 卷二 藝文類 二

心滋惡之乃表其概而繫之銘曰

明綱中弛不再延千鈞一髮誰幹旋忠肝塗地莫回天馬場凝碧生蘭茝飛燐夜照靈旗還嗚咽往事傳曉鵲一蝸之角國其顛安龍餘喘吁可憐太阿已假權奸權前籌前籌孰策孱王孱蕭牆况乃荆棘纏吁嗟公等何拳拳欲除梟獍調鷹鷂社稷苟利他何牽天乎不欲明祚綿金甌碎矣無瓦全英光宵燭箕斗躔一笑十八頭顱捐求仁而得奚怨馬配義無餒真浩然公乎何恨賡重泉奸雄卒亦溝壑填褒忠聖代恩猶宣後來觀者其審旃祥柯之嶺盤之川千秋長並厓山傳司牧勤護三尺阡來者憑弔為流連靈兮莫接天路迢大荒披髮空涕連鐫珉再拜將吾虔教忠可以千萬年

光緒五年夏五月貴州學使韋業祥拜撰

過十八先生廢祠

岳陽 陳壽麟 雪芝

命畀於天還之天身養於國還之國文章有神交有道誰忍獨生誰
不活誅莽存漢劉秀心二十八宿風雲合南籠一撮來勤王碧雞無
靈龜不答有明末造天為烏璫黨誠難緩戮屠張李荏苒草竊耳兇
鋒虐燄逼天衢數萬淨軍密獻鑰羽林誰捐干城軀神州既陷皇子
逃福王息息贅南都張復據蜀海內沸何有於天末烏蠻之一隅史
閣部公神不助狗命阮馮偷眼覷報書懔懔鑑淮河是時復社東林
之義其最著窮邊骨肉在斯文玉步忍覩更義馭慈雲蒼蒼吳月沈
南藩肯把降旗豎孫可望彼何人桂王借箸竟胡秦官家舊地縱式
廊奢香九驛悉荆榛相有謀將無語事成王福禍臣處自吳暨全十
八忠四月八日天鼓轟轟落紅雨斫他郅支頭不見飛將軍右袖七
興義府志續編 卷二 藝文類 三

首圖終見左椎博浪無斧斤仰天一哭時哉命今夕何夕猶冠帶鬼
園賦雪枚乘流雞距草檄子安輩益嘗之客田橫島不必三千五百
鐵骨碎宮殿灰燼盤江涸生則持裳死朕襁思陵地下應相親笑勝
當日殿上趨儒臣無慮王為朕殲士為朕殉繫何瀛洲之舊數乃自
萬里來彬彬 聖朝版圖特邁古典禮優及三殷仁恪有奉兮墓有
表發幽慰隱無遺人先生遺跡今興義小醜跳梁又幾次南皮太守
翩跹來築先生祠妥神位石亭池樹水亦有薦以菊醬雞縱羊菌土
產之聊備招徠之狃復背叛巢穴此地十餘禩先生大名得其時肝
蠻若不得其地仰挹靈芬增歎息頽垣空被春山翠君不見濟火廟
與竹王祠杖屨而來者胡為紛紛競逐羅施戲

重修十八先生祠作

岳陽 余雲煥 完翁